

史部

地理

四库家藏

水经注 (二)

读史方輿纪要 (一一九卷)

山東畫報出版社



水 经 注

(二)

◎ ◎

刘 郦
周 道
堂 元

整 著
理



卷 三 十 一

澧 水

澧水出南阳鲁阳县西之尧山。

尧之末孙刘累以龙食帝孔甲，孔甲又求之不得，累惧而迁于鲁县，立尧祠于西山，谓之尧山。故张衡《南都赋》曰：奉先帝而追孝，立唐祠于尧山。尧山在太和川太和城东北，澧水出焉。张衡《南都赋》曰：其川洩则澧涿遄涿，发源岩穴，布漫漫汗，漉沆洋溢，总括急趣，箭驰风疾者也。澧水又历大和川，东径小和川，又东，温泉水注之，水出北山阜，七源奇发（案近刻脱阜字，源讹作泉），炎热特甚。阚骃曰：县有汤水，可以疗疾（案近刻疾下有矣字）。汤侧又有寒泉焉，地势不殊，而炎凉异致，虽隆火盛日，肃若冰谷矣，浑流同溪，南注澧水（案南下，近刻有流字）。澧水又东径胡木山，东流，又会温泉口。水出北山阜，炎势奇毒，痼疾之徒，无能澡其冲，漂救痒者，咸去汤十许步别池，然后可入。汤侧有石铭，云皇女汤，可以疗万疾者也。故杜彦达云：然如沸汤，可以熟米，饮之愈百病（案饮之，近刻讹作饭而）。道士清身沐浴，一日三饮（案近刻讹作饭），多少自在，四十日后，身中万病愈，三虫死，学道遭难逢危，终无悔心，可以牢神存志，即《南都赋》所谓汤谷涌其后者也。然宛县有紫山，山东有一水，东西十五里，南北二百步，湛然冲满，无所通会，冬夏常温，世亦谓之汤谷也。非鲁阳及南阳之县故也，张平子广言土地所苞，明非此矣。澧水又东，房阳川水注之，水出南阳雒县西房阳川，北流，注于澧。澧水之北，有积石焉，世谓女灵山。其山平地介立，不连冈以成高，峻石孤峙，不托势以自远。四面壁绝，极能灵举，远望亭亭，状若单楹插霄矣。北面有如颓落，劣得通步，好事者时有扳陟

史部

地理

水经注

卷三十一

耳。泄水又与波水合，水出霍阳西川大岭东谷，俗谓之歇马岭，川曰广阳川，非也，即应劭所谓孤山，波水所出也。马融《广成颂》曰：浸以波差。其水又南径蛮城下，盖蛮，别邑也，俗谓之麻城，非也。波水又南分三川于白亭东，而俱南入泄水。泄水自下，兼波水之通称也。是故阌骊有东北至定陵入汝之文。泄水又东径鲁阳县故城南，城，即刘累之故邑也。有鲁山（案近刻脱山字），县居其阳，故因名焉，王莽之鲁山也。昔在于楚，文子守之，与韩遄战（案遄，近刻作构，下有难字），有返景之诚，内有南阳都乡正卫为碑。泄水右合鲁阳关水，水出鲁阳关外分头山横岭下，夹谷东北入泄。泄水又东北合牛兰水，水发县北牛兰山，东南径鲁阳城东，水侧有汉阳侯焦立碑。牛兰水又东南，与柏树溪水合，水出鲁山北峡谷中，东南流，径鲁山西，而南合牛兰水。又东南径鲁山南，阌骊曰：鲁阳县，今其地鲁山是也。水南注于泄。泄水东径应城南，故应乡也，应侯之国，《诗》所谓应侯顺德者也。彭水注之，俗谓之小泄水，水出鲁阳县南彭山蚁坞东麓，北流径彭山西，下有彭山庙，庙前有彭山碑。汉桓帝元嘉三年，杜仲长立。彭水径其西北，汉安邑长尹俭墓东，冢西有石庙，庙前有两石阙，阙东有碑，阙南有二狮子相对，南有石碣二枚，石柱西南，有两石羊，中平四年立。彭水又东北流，直应城南而入泄。泄水又左合桥水，水出鲁阳县北恃山东南，径应山北，又南径应城西，《地理志》曰：故父城县之应乡也，周武王封其弟为侯国。应劭曰：《韩诗外传》称周成王与弟戏，以桐叶为圭，曰吾以封汝。周公曰：天子无戏言。王乃应时而封，故曰应侯乡，亦曰应乡。按《吕氏春秋》云：成王以桐叶为圭，封叔虞，非应侯也。汲郡古文，殷时已有应国，非成王矣。战国范雎所封邑也，谓之应水。泄水又东径犇县故城北，《左传》昭公元年冬，楚公子围使伯州犁城犇是也。出于鱼齿山下，《春秋》襄公十八年，楚伐郑，次于鱼陵，涉于鱼齿之下，甚雨，楚师多冻，役徒几尽（案役徒，近刻作徒役）。晋人闻有楚师，师旷曰：不害。吾骤歌北风，又歌南风。南风不竞，多死声，楚必无功矣。所涉即泄水也。水南有汉中常侍长乐太仆吉成侯州苞冢（案近刻脱成字州



字)，冢前有碑，基西枕冈，城开四门，门有两石兽，坟倾墓毁，碑兽沦移，人有掘出一兽，犹全不破，甚高壮，头去地减一丈许，作制甚工，左膊上刻作辟邪字。门表堊上，起石桥，历时不毁。其碑云：六帝四后，是咨是諏。盖仕自安帝，没于桓后。于时阉闾擅权，五侯暴世，割剥公私，以事生死。夫封者表有德，碑者颂有功，自非此徒，何用许为？石至千春，不若速朽，苞墓万古，祇彰消辱。呜呼，愚亦甚矣！潢水又东，犍水注之，俗谓之秋水，非也。水有二源，东源出其县，西南践犍山东崖下，水方五十许步，不测其深，东北流径犍县南，又东北屈径其县东，而北合西源水，（案源近刻讹作流）。西源出县西南颇山北阜下，东北径犍城西，又屈径其县北，东合右水（案右，近刻讹作二），乱流北注于潢。汉高祖入关，破南阳太守吕雉于犍东，即于是地，潢水之阴也。潢水又东南径昆阳县故城北，昔汉光武与王寻王邑战于昆阳，败之，走者相腾践奔殪，百余里间（案近刻脱间字），会大雨如注，潢川盛溢（案川，近刻作水），虎豹皆股战，士卒争赴溺死者以万数，水为不流，王邑严尤陈茂轻骑，皆乘尸而度矣。

东北过颍川定陵县西北又东过郾县南，东入于汝。

潢水东径西不羹亭南，亭北背汝水，于定陵城北，东入汝，郾县在南，不得过。

清 水

清水出弘农卢氏县支离山（案支，近刻作攻），东南过南阳西鄂县西北，又东过宛县南。

清水导源东流，径郾县故城北，郭仲产曰：郾县故城，在支离山东南（案近刻讹作故城南，在攻离山东），郾旧县也。三仓曰樊、邓、郾。郾有二城，北郾也（案后魏析置南北郾，湍水径南郾城东，清水径北郾城北）。汉祖入关，下浙郾，即此县也。清水又东，南流，历雒县之衡山（案近刻脱历字，之下衍雒字），东径百章郭北，又东，鲁阳关水注之。



水出鲁阳县南分水岭，南水自岭南流，北水从岭北注，故世俗谓此岭为分头也。其水南流，径鲁阳关，左右连山插汉，秀木干云。是以张景阳诗云：朝登鲁阳关，峡路峭且深。亦司马芝与母遇贼处也。关水历雒衡山西，南径皇后城西，建武元年，世祖遣侍中傅俊，持节迎光烈皇后于清阳，俊发兵三百余人，宿卫皇后道路归京师，盖税舍所在，故城得其名矣。山有石室，甚饰洁，相传名皇后浴室，又所幸也。关水又西南，径雒县故城南，昔秦文公之世，有伯阳者（案伯阳，近刻讹作阳伯），逢二童曰吕曰被（案近刻讹作彼），二童，二雒也，得雒者霸，雄者王，二童翻飞，化为双雒，光武获雒于此山，以为中兴之祥，故置县以名焉。关水又屈而东南流，注于清。清水又东南流，径博望县故城东（案县下，近刻衍西北二字）。郭仲产曰：在郡东北百二十里（案近刻脱在字），汉武帝置。校尉张骞，随大将军卫青西征，为军前导，相望水草，得以不乏。元光六年，封骞为侯国。《地理志》，南阳有博望县（案志下，近刻衍曰字，又脱博字）。王莽改之曰宜乐也。清水又东南径西鄂故城东，应劭曰：江夏有鄂，故加西也。昔刘表之攻杜子绪于西鄂也，功曹柏孝长（案柏，近刻讹作伯），闻战鼓之音，惧而闭户，蒙被自覆，渐登城而观，言勇可习也。清水又南（案清，近刻讹作清），洱水注之，水出弘农郡卢氏县之熊耳山，东南径郦县北，东南径房阳城北。汉哀帝四年，封南阳太守孙宠为侯国，俗谓之房阳川。又径西鄂县南，水北有张平子墓，墓之东侧，坟有平子碑，文字悉是古文，篆额是崔瑗之辞，盛弘之、郭仲产并云夏侯孝若为郡，薄其文，复刊碑阴为铭。然碑阴二铭，乃是崔子玉及陈翕耳，而非孝若，悉是隶字，二首并存，尝无毁坏。又言墓次有二碑，今惟见一碑，或是余夏景驿途（案景，近刻作径），疲而莫究矣。水南道侧，有二石楼，相去六七丈，双峙齐竦，高可丈七八，柱圆围二丈有余，石质青绿，光可以鉴，其上桷栌承拱（案栌，近刻讹作栌），雕檐四注（案近刻讹作柱），穷巧绮刻，妙绝人工。题言蜀郡太守姓王，字子雅，南阳西鄂人，有三女无男，而家累千金，父没当葬，女自相谓曰：先君生我姊妹，无男兄弟，今当安神玄宅，翳灵后土，冥冥绝

后，何以彰吾君之德？各出钱五百万，一女筑墓，二女建楼，以表孝思，铭云墓楼。东平林下近坟墓（案下，近刻作不），而不能测其处所矣。洹水又东南流，注于清水，世谓之肄水（案近刻脱此二字）。肄洹声相近，非也。《地理志》曰：熊耳之山，出三水，洹水其一焉，东南至鲁阳入沔是也。清水又南径预山东，山上有神庙，俗名之为独山也。山南有魏车骑将军黄权夫妻二冢，地道潜通。其冢前有四碑，其二魏明帝立，二是其子及臣吏所树者也。清水又西南径史定伯碑南，又西，为瓜里津。水上有三梁，谓之瓜里渡。自宛道途东出堵阳，西道方城（案堵，近刻讹作赭，西讹作而）。建武三年，世祖自堵阳西入，破虏将军邓奉，怨汉掠新野，拒瓜里，上亲搏战，降之。夕阳下，遂斩奉。《郡国志》所谓宛有瓜里津（案里下，近刻有野字），夕阳聚者也。阻桥，即桓温故垒处。温以升平五年，与范汪众军北讨所营（案所，近刻讹作列）。清水又西南径晋蜀郡太守邓义山墓南，又南径宛城东，其城故申伯之都（案城，近刻作地），楚文王灭申以为县也。秦昭襄王使白起为将，伐楚取郢，即以此地为南阳郡，改县曰宛，王莽更名郡曰前队，县曰西阳。刘善曰：在中国之南而居阳地，故以为名。大城西南隅即古宛城也，荆州刺史治，故亦谓之荆州城。今南阳郡治大城，其东城内有旧殿基（案近刻重一城字），周二百步，高八尺，陛阶皆砌以青石。大城西北隅，有殿基，周百步，高五尺（案近刻脱殿字，尺讹作丈），盖更始所起也。城西三里（案城。近刻讹作地），有古台，高三丈余，文帝黄初中，南巡行所筑也。清水又屈而径其县南，故《南都赋》所言，清水荡其胸者也。王莽地皇二年，朱鲋等共于城南，会诸将，设坛燔燎，立圣公为天子于斯水上。《世语》曰：张绣反，公与战，败，子昂不能骑，进马于公，而昂遇害。《魏书》曰：公南征至宛（案近刻脱南字），临清水，祠阵亡将士（案近刻脱阵字），歔歔流涕，众皆哀恻。清水又南，梅溪水注之，水出县北紫山，南径百里奚故宅。奚，宛人也，于秦为贤大夫，所谓迷虞智秦者也。梅溪又径宛西宫城东（案梅，近刻讹作紫）。《史记》曰：吕尚先祖为四岳，佐禹治水有功，虞夏之际，受封于吕，故因氏为吕尚也。徐广



《史记音义》曰：吕在宛县，高后四年，封昆弟子吕忿为吕城侯，疑即此也。又按新蔡县，有大吕小吕亭，而未知所是也。梅溪又南径杜衍县东，故城在西（案此下，近刻衍按字）。汉高帝七年，封郎中王翳为侯国，王莽更之曰闰衍矣。土地垫下，湍溪是注，古人于安众竭之，令游水是潜（案令，近刻讹作今），谓之安众港。世祖建武三年，上自宛，遣颍阳侯祭遵西击邓奉弟终（案近刻讹作众），破之于杜衍，进兵涅阳者也。梅溪又南，谓之石桥水，又谓之女溪（案女，近刻讹作汝），南流（案南，近刻讹作之），而左注淯水。淯水之南，又有南就聚，《郡国志》所谓南阳宛县，有南就聚者也。郭仲产言宛城南三十里，有一城甚卑小，相承名三公城，汉时邓禹等，归乡饯离处也。盛弘之著《荆州记》，以为三公置，余按淯水左右，旧有二渚，所谓南渚北渚者，水侧之渚，聚在淯阳之东北，考古推地，则近矣。城侧有范蠡祠。蠡，宛人，祠，即故宅也。后汉末，有范曾，字子闵，为大将军司马，讨黄巾贼至此祠，为蠡立碑，文勒可寻。夏侯湛之为南阳，又为立庙焉。城东有大将军何进故宅，城西有孔嵩旧居，嵩字仲山，宛人，与山阳范式有断金契，贫无养亲，赁为阿街卒，遣迎式，式下车把臂曰：子怀道卒伍，不亦痛乎？嵩曰：侯嬴贱役晨门，卑下之位，古人所不耻，何痛之有？故其赞曰：仲山通达，卷舒无方，屈身厮役，挺秀含芳。

又屈南过淯阳县东。

淯水又南入县，径小长安，司马彪《郡国志》曰：县有小长安聚。谢沈《汉书》，称光武攻淯阳不下，引兵欲攻宛，至小长安，与甄阜战，败于此。淯水又西南，径其县故城南，桓帝延熹七年，封邓秉为侯国（案秉，近刻讹作康）。县，故南阳典农治，后以为淯阳郡，省郡复县，避晋简文讳，更名云阳焉（案云，近刻作云）。淯水又径安乐郡北，汉桓帝建和元年（案近刻讹作六年），封司徒胡广为淯阳县安乐乡侯，今于其国，立乐宅戍。郭仲产《襄阳记》曰：南阳城南九十里，有晋尚书令乐广故宅，广字彦辅（案此下衍也字），善清言，见重当时，成都王广女婿，长沙王猜之，广曰：宁以一女而易五男，犹疑之，终以忧殒，其故居。今置戍，因



以为名。

又南过新野县西。

清水又南入新野县，枝津分派，东南出隔衍苞注（案苞字，近刻讹在隔字上），左积为陂，东西九里，南北十五里，陂水所溉，咸为良沃。清水又南与湍水会，又南径新野县故城西，世祖之败小长安也，姊元遇害，上即位，感悼姊没，追谥元为新野节义长公主，即此邑也。晋咸宁二年，封大司马扶风武王少子歆为新野郡公，割南阳五属、棘阳、蔡阳、穰邓、山都封焉（案近刻五讹作伍，脱棘字，又封焉，讹作封为）。王文舒更立中隔（案此句上下有脱误，《三国志》，王昶字文舒，朱谋玮以王字属上句，作封为王，非也），西即郡治，东则民居，城西傍清水，又东与朝水合，水出西北赤石山，而东南径冠军县界，地名沙渠。又东南径穰县故城南，楚别邑也。秦拔鄢郢，即以为县，秦昭王封相魏冉为侯邑，王莽更名曰农穰也（案农，近刻讹作丰）。魏荆州刺史治。朝水又东，南分为二水，一水枝分东北，为樊氏陂，陂东西十里（案西，近刻讹作四），南北五里，俗谓之凡亭陂。陂东有樊氏故宅，樊氏既灭，庾氏取其陂，故谚曰：陂汪汪下田良，樊子失业庾公昌。昔在晋世，杜预继信臣之业，复六门陂（案近刻陂上衍之字），遏六门之水，下结二十九陂诸陂散流，咸入朝水，事见六门碑。六门既陂，诸陂遂断。朝水又东径朝阳县故城北，而东南注于清水。又东南与棘水合，水上承堵水（案堵，近刻讹作赭，下同）。堵水出棘阳县北山（案近刻脱山字），数源并发，南流径小堵乡，谓之小堵水。世祖建武二年，成安侯臧宫，从上击堵乡（案乡，近刻讹作也），东源方七八步，腾涌若沸，故世名之腾沸水，南流径于堵乡，谓之堵水。建武三年，祭遵引兵，南击董訢所堵乡，以水氏县，故有堵阳之名也。《地理志》曰：县有堵水，王莽曰阳城也，汉哀帝改为顺阳。建武二年，更封安阳侯朱祐为堵阳侯。堵水于县（案近刻脱于字），竭以为陂，东西夹冈，水相去五六里，古今断冈两舌（案朱谋玮云：当作左右断冈两舌。冈外下垂陂陀而出者谓之舌），都水潭涨，南北十余里，水决南溃，下注为湾，湾分为二，西为堵水，东为茱源，堵



水参差，流结两湖，故有东陂西陂之名。二陂所导，其水枝分（案其，近刻讹作俱），东南至会口入比（案原本及近刻，并讹作泚，下同，今改正，比水见卷之二十九）。是以《地理志》比水、堵水，皆言入蔡，互受通称故也。二湖流注，合为黄水，惟所受焉（案惟，近刻讹作谓）。径棘阳县之黄淳聚，又谓之黄淳水者也。谢沈《后汉书》（案谢上，近刻衍故字，又脱后字）：甄阜等败光武于小长安东，乘胜南渡黄淳水，前营背阻两川（案背，近刻讹作皆），谓临比水，绝后桥，示无还心，汉兵击之，三军溃（案三，近刻讹作二），溺死黄淳水者二万人。又南径棘阳县故城西，应劭曰：县在棘水之阳（案近刻脱水字）。是知斯水为棘水也。汉高帝七年，封杜得臣为侯国。后汉兵起，击唐子乡，杀湖阳尉，进拔棘阳，邓晨将宾客，会光武于此县也。棘水又南径新野县，历黄邨聚，世祖建武三年，傅俊岑彭进击秦丰，先拔黄邨者也，谓之黄邨水。大司马吴汉破秦丰于斯水之上，其聚落悉为蛮居，犹名之为黄邨蛮。棘水自新野县东，而南流入于洧水，谓之有力口也，棘力声相近，当为棘口也，又是方俗之音，故字从读变，若世以棘子木为力子木是也（案近刻讹作为力子之木也）。洧水又东南径士林东，戍名也，戍有邸阁水，左有豫章大陂，下灌良畴三千许顷也。

南过邓县东（案南，近刻讹作西）。

县，故邓侯吾离之国也，楚文王灭之，秦以为县。洧水右合洧水（案洧，近刻讹作清），俗谓之弱沟水，上承白水于朝阳县，东南流，径邓县故城南，习凿齿《襄阳记》曰：楚王至邓之洧水，去襄阳二十里，即此水也。洧水又东径邓塞北（案近刻讹作者），即邓城东南小山也，方俗名之为邓塞（案方俗，近刻讹作先后）。昔孙文台破黄祖于其下。洧水东流注于洧。洧水又南径邓塞东，又径鄆城东，古鄆子国也，盖邓之南鄙也。昔巴子请楚与邓为好，鄆人夺其币，即是邑也，司马彪以为邓之鄆聚矣。

南入于沔（案此四字，近刻接前经文南过邓县东下）。



潏 水

潏水出潏强县南泽中，东入颍。

潏水出颍川阳城县少室山，东流注于颍水（案此，即颍水注内所谓中水导源少室通阜者），而乱流东南，径临颍县西北，小潏水出焉（案此，即颍水注内所谓颍水自县西，小潏水出也），东径临颍县故城北。潏水又东径潏阳城北，又东径潏强县故城南，建武二年（案近刻讹作元年），世祖封扬化将军坚鐔为侯国。潏水东为陶枢陂（案临颍西北派分之小潏水，终于此），余按潏阳城，在潏水南，然则此城正应为潏阴城，而有潏阳之名者，明在南犹有水潏，故此城以阳为名矣。颍水之南有二渚，其南渚东南流（案近刻此下衍行字），历临颍亭西，东南入汝，今无水也，疑即潏水之故渚矣。汝水于奇锥城西，别东派，时人谓之大潏水（案此，即汝水注内所谓渚水，世亦谓之大潏水者也），东北流，枝渚右出，世谓之死汝也。别汝又东北径召陵城北，练沟出焉。别汝又东，汾沟出焉。别汝又东，径征羌城北，水南有汾陂，俗音羹。汾水自别汝东注而为此陂，水积征羌城北四五里，方三十里许。渚左合小潏水（案此别一小潏水，与上小潏水同名异实，上小潏水，在颍水之北，此小潏水，在颍水之南），水上承狼陂，南流，名曰巩水。青陵陂水，自陂东注之（案青，原本及近刻，并讹作清，今改正，狼陂青陵陂，并见颍水注内），东回，又谓之小潏水，而南流注于大潏水。大潏水取称，盖藉潏沿注而总受其目矣（案沿，近刻讹作汾，其讹作巨）。又东径西华县故城南，又东径汝阳县故城北，东注于颍。

濯 水

濯水出汝南吴房县西北奥山（案奥，近刻讹作兴），东过其县北，入于汝。

史部

地理

水经注

卷三十一

县西北有棠谿城(案棠,近刻讹作堂,下同),故房子国,《春秋》定公五年,吴王阖闾弟夫概奔楚,封之于棠谿,故曰吴房也。汉高帝八年,封庄侯杨武为侯国。建武中,世祖封泗水王歙烱子烱为棠谿侯。山溪有白羊渊,渊水旧出山羊。汉武帝元封二年,白羊出此渊(案近刻此讹作北),畜牧者祷祀之,俗禁,拍手尝有羊出水,野母惊拍(案近刻讹作扑),自此绝焉。渊水下合濯水,濯水东径濯阳县故城西,东流入滌水,乱流径其县南。世祖建武二十八年(案近刻讹作元年),封吴汉孙旦为侯国(案旦,近刻讹作且)。其水又东入于汝水。

滌 水

滌水出沅阴县东上界山。

《山海经》谓之视水也。郭景纯注,或曰视宜,为滌出藏山。许慎云出中阳山,皆山之殊目也。而东与泌水合,水出沅阴县旱山,东北流,注滌。滌水又东北,杀水出西南大熟之山东北流,入于滌。滌水又东沦水注之,水出宣山,东南流注滌水(案东南,近刻作南东),滌水又东得奥水口,水西出奥山,东入于滌水也。

东过吴房县南,又东过濯阳县南。

应劭曰:濯水出吴房县东,入滌县之西北,即两川之交会也。

又东过上蔡县南,东入汝。

沅 水

沅水出沅阴县西北扶予山,东过其县南。

《山海经》曰:朝歌之山,沅水出焉,东南流注于茱(案近刻脱南字注字)。经书扶予者,其山之异名乎?茱水上承堵水,东流,左与西辽水合,又东,东辽水注之,俱导北山而南流,注于茱。茱水又东北,于沅阴县北,左会沅水,其道稍西(案其近刻讹作之),不出其县南,其故城

在山之阳。汉光武建武中，封岑彭为侯国。汉以为阳山县。魏武与张绣战于宛，马名绝景，为流矢所中，公伤右臂，引远沔阴，即是地也。城之东有马仁陂，郭仲产曰：陂在比阳县西五十里（案近刻脱西字），盖地百顷，其所周溉田万顷，随年变种，境无俭岁。陂水三周其隍，故渚自隍西南，而会于北沔水，不得复径其南也，且邑号沔阴，故无出南之理，出南则为阳也，非直不究，又不思矣。沔水又东北，澧水注之（案澧，近刻讹作河），水出雉衡山，东南径建城东（案东字，近刻讹在山字上）。建当为卷，字读误耳。《郡国志》云：叶县有卷城。其水又东流，入于沔。沔水东北径于东山西，西流入沔（案此四字上有脱文）。沔水之左，即黄城山也，有溪水出黄城山（案近刻，脱有溪二字），东北径方城，《郡国志》曰：叶县有方城。郭仲产曰：苦菜于东之间（案菜，近刻讹作莱，下同），有小城名方城，东临溪水，寻此城致号之由，当因山以表名也。苦菜，即黄城也。及于东，通为方城矣，世谓之方城山。水东流注沔水，故《圣贤冢墓记》曰：南阳叶邑方城西，有黄城山（案《圣贤冢墓记》，原本及近刻，并讹作《地理志》。考《地理志》南阳叶下，云有长城，号曰方城，更无此文。又邑字，讹在方城下，今据归有光本改正），是长沮桀溺耦耕之所。有东流水，则子路问津处。尸子曰：楚狂接舆耕于方城，盖于此也。盛弘之云：叶东界有故城，始犇县东，至淅水，达比阳界，南北联，联数百里，号为方城，一谓之长城云。郦县有故城一面，未详里数，号为长城，即此城之西隅，其间相去六百里。北面虽无基筑（案北面，近刻讹作若南北），皆连山相接，而汉水流其南，故屈完答齐桓公云：楚国方城以为城，汉水以为池。《郡国志》曰：叶县有长山曰方城（案山，近刻讹作城），指此城也。沔水又东北历舞阳县故城南，汉高祖六年，封樊噲为侯国也。

又东过西平县北。

县，故柏国也。《春秋左传》所谓江黄道柏，方睦于齐也。汉曰西平，其西吕墟，即西陵亭也，西陵平夷，故曰西平。汉宣帝甘露三年，封丞相于定国为侯国，王莽更之曰新亭。晋太康《地记》曰（案《地记》，



近刻讹作《地理志》):县有龙泉水,可以砥砺刀剑,特坚利,故有坚白之论矣。是以龙泉之剑,为楚宝也,县出名金,古有铁官。

又东过郾县南。

郾县故城,去此远矣,不得过。

又东过定颍县北,东入于汝。

汉安帝永初二年,分汝南郡之上蔡县,置定颍县。顺帝永建元年(案此六字,近刻讹作延光中三字),以阳翟郭镇为尚书令(案镇下,近刻衍之字),封定颍侯,即此邑也。

潕 水

潕水出蔡阴县。

潕水出县东南大洪山,山在随郡之西南,竟陵之东北,槃基所跨,广圆百余里,峰曰悬钩,处平原众阜之中(案原,近刻讹作县),为诸岭之秀。山下有石门,夹郭层峻岩高皆数百许仞。入石门,又得钟乳穴,穴上素崖壁立,非人迹所及,穴中多钟乳,凝膏下垂,望齐冰雪,微津细液,滴沥不断,幽穴潜远。行者不极穷深,以穴内常有风热(案近刻以讹作而,热讹作势,又此句之下,衍火字),无能经久故也(案能下,近刻衍以字)。潕水出于其阴,初流浅狭,远乃广厚,可以浮舟筏巨川矣。时人以潕水所导,故亦谓之潕山矣。潕水东北流,合石水。石水出大洪山,东北流注于潕,谓之小潕水,而乱流东北,径上唐县故城南,本蔡阳之上唐乡旧唐侯国。《春秋》定公三年,唐成公如楚,有两肃霜马,子常欲之,弗与,止之。三年,唐人窃马而献之子常,归唐侯是也。潕水又东,均水注之,水出大洪山(案近刻脱大字),东北流,径土山北(案此下,近刻有山上土山四字,系衍文),又东北流入于潕水,潕水又屈而东南流。

东南过随县西(案过,近刻讹作径)。

县,故随国矣。《春秋左传》所谓汉东之国,随为大者也。楚灭之

以为县，晋武帝太康中（案近刻脱帝字），立为郡。有澁水出县西北黄山南，径潏西县西，又东南，潏水入焉。潏水出桐柏山之阳，吕忱曰：水在义阳，潏水东南径潏西县西，又东南注于澁（案注，近刻讹作流）。澁水又东南径随县故城西，《春秋》鲁庄公四年，楚武王伐随，令尹斗祁莫敖屈重除道梁澁，军临于随，谓此水也。水侧有断蛇丘，随侯出而见大蛇中断，因举而药之，故谓之断蛇丘，后蛇衔明珠报德，世谓之随侯珠，亦曰灵蛇珠。丘南有随季梁大夫池，其水又南与义井水合，水出随城东南，井泉尝涌，溢而津注，冬夏不异，相承谓之义井，下流合澁。澁水又南流，注于潏。潏水又会于支水，水源亦出大洪山，而东流注于潏。潏水又径随县南随城山北而东南注。

又南过江夏安陆县西。

随水出随郡永阳县东石龙山（案随，近刻讹作迂，下同），西北流，南回径永阳县西，历横尾山，即《禹贡》之陪尾山也。随水又西南至安陆县故城西，入于潏（案近刻脱此三字），故郢城也，因冈为墉，峻不假筑。潏水又南径石岩山北，昔张昌作乱于其下，笼彩凤以惑众。晋太安二年，镇南将军刘弘，遣牙门皮初，与张昌战于清水，昌败，追斩于江涘（案涘，近刻讹作夏）。即《春秋左传》定公四年，吴败楚于柏举从之及于清发，盖潏水兼清水之目矣（案近刻，脱此六字）。又东南流，而右会富水，水出竟陵郡新市县东北大阳山，水有二源，大富水出山之阳，南流而左合小富水，水出山之东，而南径三王城东。前汉末，王匡、王凤、王常所屯，故谓之三王城。城中其故碑，文字阙落，不可复识。其水屈而西南流，右合大富水，俗谓之大泌水也。又西南流，径杜城西，新市县治也。《郡国志》以为南新市也，中山有新市，故此加南，分安陆县立（案近刻讹作立县）。又王匡中兴，初举兵于县，号曰新市兵者也。富水又东南流，后安陆界，左合土山水，世谓之章水。水出土山，南径随郡平林县故城西，俗谓之将陂，城与新市接界，故中兴之始，兵有新市平林之号。又南流，右入富水，富水又东入于潏。潏水又径新城南，永和五年，晋大司马桓温筑。潏水又会温水，温水出竟陵之新阳县东



泽中，口径二丈五尺，垠岸重沙，端净可爱，靖以察之，则渊泉如镜，闻人声，则扬汤奋发，无所复见矣。其热可以焯鸡，洪洌百余步，冷若寒泉，东南流，注于浞水。又右得潼水，水出江夏郡之曲陵县西北潼山，东南流，径其县南，县治石潼故城。城圆而不方，东入安陆，注于浞 223 水。

又东南入于夏。

浞水又南，分为二水，东通潏水，西入于沔，谓之浞口也。

四

库

家藏